

XAS MUAS PHAU IB

Xas Muas Phau Ib, Zaj 1

As Nas tus txiv mus txi Ntuj nyob Xis Laus. 1 : 1 - 8.

- 1** 1 Thaud, muaj ib tug txiv neej nyob Las Mas. Nws tuaj ntawm lub roob Es Fais tuaj. Nws hu ua Es Kas Nas.
2 Nws yuav ob tug poj niam. Ib tug hu ua As Nas, ib tug hu ua Pes Nis Nas. Pes Nis Nas muaj me nyuam, tab sis As Nas tsis muaj.
3 Niaj xyoo tus txiv neej ntawd mus teev Ntuj thiab txi Ntuj pem Xis Laus. Nyob ped, yog Es Lis ob tug tub hu ua Hos Nis thiab Pis Nas nkawd ua Leej Choj.
4 Muaj ib hnub Es Kas Nas mus txi Ntuj. Thaum nws txi Ntuj nws faib kam tej thooj nqaij rau Pes Nis Nas, rau Pes Nis Nas cov tub thiab cov ntxhais. 5 Nws tsuas tseg ib thooj rau As Nas xwb. Nws nyiam As Nas dua, tab sis HUAB TAIS ho tsis pub As Nas xeeb tub. 6 Pes Nis Nas ua tej Yam kom tu As Nas siab, ua kom As Nas npau taws, vim As Nas tsis muaj me nyuam.
7 Niaj xyoo thaum lawv mus pem lub tsev txi Ntuj mas Pes Nis Nas ua zoo li ntawd kom tu As Nas siab. Ces As Nas quaj quaj, nws tsis noj mov.
8 Ces nws tus txiv Es Kas Nas hais rau nws tias :
"As Nas, vim li cas koj quaj quaj koj tsis noj mov ? Vim li cas koj tu siab ? Koj tau kuv, tsis zoo dua koj tau kaum leej tub lod ?"

As Nas thov Ntuj. 1 : 9 - 18.

- 9 Thaum lawv noj mov hauv kem tsev pw tas, As Nas sawv, nws mus nyob ntawm HUAB TAIS xub ntiag. Tus Leej Choj Es Lis zaum nyob hauv nws lub rooj

zaum uas ib ntawm lub qhov rooj tsev txi Ntuj. 10 As Nas tu siab tas nrho, nws thov HUAB TAIS thiab nws quaj heev kawg. 11 As Nas thiaj fiv ib lub yeem zoo li no : "HUAB TAIS Xas Npas Os ! Yog koj xav ntsia koj tus ntxhais txib txoj kev txom nyem, yog koj nco txog nws, yog koj muab ib tug tub rau kuv, mas kuv yuav muab nws rau HUAB TAIS tas nws sid. Rab chais yuav tsis chhv nws taub hau."
12 As Nas teev Ntuj ntev loo. Es Lis ntsia ntsoov As Nas qhov ncauj. 13 As Nas hais lus ntxhi xwb. Pom nws di ncauj ua zog, tab sis tsis hnov nws lub suab. Ces Es Lis xav tias As Nas vwm cawv. 14 Es Lis mus hais rau As Nas tias : "Koj yuav vwm cawv txog thaum twg ? Koj ua kom koj zoo cawv sai mas !"
15 Tab sis As Nas teb tias : "Txiv tswv, kuv kawg yog ib tug poj niam ua neej lwj siab ntsuav xwb. Kuv tsis tau haus cawv txiv ntoo los cawv txhuv li. Kuv hais kuv txoj kev lwj siab rau HUAB TAIS xwb."
16 Thov koj tsis txhob xav tias koj tus ntxhais txib yog neeg tsis tsim txiaj dab tsi. Yog vim tu kuv siab dhau thiab mob kuv siab dhau mas kuv thiaj hais lus txog tav no."
17 Ces Es Lis teb tias : "Koj mus, koj ua siab kaj lug. His Xas Lais tus Tswv Ntuj yuav pub rau koj raws li koj thov."
18 Tus poj niam hais tias : "Thov kom koj tus ntxhais txib tau ua neeg xis koj siab."
Ces As Nas mus lawm. Nws mus hauv kem tsev pw, nws noj mov tas nws lub

Xas Muas Phau Ib, Zaj 1 thiab 3

ntsej muag tsis zoo li lub qub lawm.

Xas Muas yug los. As Nas cev Xas Muas rau Tswv Ntuj. 1 : 19 - 28.

19 Lawv sawv ntxov ntxov, lawv pe Tswv Ntuj tas ces lawv rov qab mus tsev nyob Las Mas lawm. Es Kas Nas nrog nws poj niam As Nas koom cev. HUAB TAIS nco txog As Nas. 20 Ces As Nas xeeb tub, nws yug tau ib tug tub, nws muab tis npe hu ua Xas Muas. As Nas hais tias :

"Kuv hu li ntawd, vim kuv thov ntawm HUAB TAIS los."

21 Thaum tau ib xyoos lawm, Es Kas Nas thiab nws tsev neeg nce mus txi HUAB TAIS thiab mus paup yeem.

22 Tab sis As Nas tsis mus, nws hais rau nws tus txiv tias :

"Kuv tos txog lub caij kuv tus me nyuam tseg taus mis tso. Kuv yuav coj nws mus cev rau HUAB TAIS ces nws yuav nyob ntawd mus li."

23 Es Kas Nas teb tias :

"Koj ua raws li koj siab, koj nyob kom txog thaum nws cais taus mis tso. Thov kom HUAB TAIS ua raws li koj lo lus !"

Ces tus poj niam nyob tu tus me nyuam mus txog lub caij cais nws mis.

24 Thaum tus me nyuam txawj noj mov lawm, As Nas coj nws mus hauv HUAB TAIS lub tsev txi Ntuj uas nyob Xis Laus. As Nas cab ib tug heev nyuj muaj peb xyoos, ib tawb hmoov nplej thiab ib hwy cawv nrog.

25 Lawv muab tus heev nyuj tua txi Ntuj tas ces As Nas mus hauv Es Lis tsev.

26 Nws hais tias :

"Txiv tswv, kuv yog tus poj niam uas tau txhos caug nyob ze koj ntawm no thov HUAB TAIS. 27 Thaum ntawd kuv thov kom Ntuj pub tus me nyuam no rau kuv.

HUAB TAUS tau mloog kuv lo lus thov.

28 Mas nyem no kuv tso tus me nyuam no rau HUAB TAIS kom nws nrog HUAB TAIS mus txog hnub tuag. Kuv muab nws rau HUAB TAIS."

Ces tus poj niam cia tus me nyuam nyob ntawd, nws muab pub rau Tswv Ntuj.

Tswv Ntuj hu Xas Muas.

3 : 1 - 20.

3 1 Tus me nyuam Xas Muas tsob hwb HUAB TAIS nyob ntawm Es Lis xub ntiag. Lub zim txwv ntawd, HUAB TAIS hais lus tsawg zaus kawg. Nws tsis tawm tuaj rau neeg pom xyeem ntau zaus. 2 Tab sis muaj ib hnub, Es Lis pw hauv nws lub paim. Thaum ntawd, nws qhov muag tsis tshua pom kev lawm. 3 Tswv Ntuj lub teeb tseem tsis tau tuag. Xas Muas pw hauv HUAB TAIS Kem Ntshiab uas Tswv Ntuj lub Xab Cog Lus nyob.

4 HUAB TAIS hu Xas Muas tias :

"Xas Muas ! Xas Muas !"

Tus me nyuam teb tias :

"Kuv nyob ntawm no !"

5 Ces nws khaiv mus hais rau Es Lis tias :

"Koj hu kuv, kuv thiaj los."

Es Lis hais tias :

"Tub, kuv tsis tau hu koj. Koj rov mus pw."

Xas Muas rov mus pw.

6 HUAB TAIS rov hu nws dua tias :

"Xas Muas ! Xas Muas !"

Ces Xas Muas mus txog ntawm Es Lis, nws hais rau Es Lis tias :

"Koj hu kuv, kuv thiaj los ntawm no."

Es Lis hais tias :

"Tub, kuv tsis tau hu koj. Koj rov mus pw."

7 Xas Muas tseem tsis tau paub HUAB

Xas Muas Phau Ib, Zaj 3 thiab 4

TAIS. Vim tsis tau muaj leej twg qhia
HUAB TAIS lo lus rau nws.
8 HUAB TAIS rov hu Xas Muas zaum
peb. Xas Muas sawv mus txog ntawm
Es Lis, nws hais tias :
"Koj hu kuv, kuv thiaj los ntawm no."
9 Ces Es Lis thiaj mam to taub tias yog
HUAB TAIS hu tus me nyuam ntawd. Es
Lis hais rau Xas Muas tias :
"Koj mus pw. Yog muaj tus hu koj mas
koj yuav hais tias : HUAB TAIS, koj hais
lus mas. Koj tus tub txib mloog koj !"
Ces Xas Muas rov mus pw qhov chaw
qub. 10 HUAB TAIS tuaj nyob ntawd.
HUAB TAIS hu nws xws li thawj peb
zaug ua ntej tias :
"Xas Muas ! Xas Muas !"
Xas Muas teb tias :
"Koj hais lus mas ! Koj tus tub txib
mloog koj !"
11 HUAB TAIS hais rau Xas Muas tias :
"Kuv yuav ua tej Yam txawv kawg nyob
hauv His Xas Lais. Tus twg tau hnov
mas tus twg pob ntseg yuav quaj.
12 Hnub ntawd, tas txhua Yam xwm kuv
tau tsawm txog Es Lis thiab nws tsev
neeg, mas kuv yuav ua kom tshwm sid
tuaj tas huv si txij lub hauv paus los txog
qhov kawg. 13 Koj yuav ceeb toom rau
Es Lis tias kuv txiav txim rau Es Lis tsev
neeg mus li. Vim nws yeej paub tias nws
cov tub thuam Tswv Ntuj tsis kav nws
tsis qhuab qhia lawv. 14 Li ntawd, mas
kuv hais lus khov lus ruaj tias tsis muaj ib
thaj txi Ntuj, tsis muaj ib Yam paj tshab
yuav ntxuav tau Es Lis tsev neeg cov
txhaum li."
15 Xas Muas pw tsaug zog txog kaj ntug.
Ces nws qhib HUAB TAIS lub tsev cov
qhov rooj. Xas Muas txhawj, nws ntshai
piav qhov nws tau pom xyeem rau Es Lis.
16 Tab sis Es Lis hu nws los, Es Lis hais
rau nws tias :

"Tub Xas Muas !"
Xas Muas teb tias :
"Kuv nyob ntawm no !"
17 Es Lis nug nws tias :
"Lo lus HUAB TAIS hais rau koj yog dab
tsi ? Koj txhob zais dab tsi mog ! Cov
lus HUAB TAIS hais rau koj, yog koj
zais ib lo mas kom HUAB TAIS coj yim
cuaj Yam xwv txheej tuaj rau koj !"
18 Ces Xas Muas piav tas puas tsav Yam,
nws tsis zais dab tsi li. Es Lis hais tias :
"HUAB TAIS yog HUAB TAIS ! Kom
nws ua raws li nws pom zoo."
19 Xas Muas hlob. HUAB TAIS nrog
nws nyob. HUAB TAIS tau hais dab tsi
rau Xas Muas lawm mas HUAB TAIS
tsis ua Yam ntawd poob li ! 20 Txij Daas
mus txog Npes Xas Npes mas, tas tsoom
His Xas Lais paub tias Xas Muas yog tus
yuav nce ua HUAB TAIS tus Yaj Saub.

Cov Fis Lis Tis txeeb tau lub Xab Cog Lus. 4 : 1 - 11.

4 1 Es Lis laus heev lawm. Nws cov
tub coj tus Yam ntxwv phem rau
HUAB TAIS li qhov qub. Thaum ntawd,
cov Fis Lis Tis sib sau los ua rog ntaus
cov His Xas Lais. Cov His Xas Lais thiaj
sawv kev mus ua rog. Lawv tuaj tsa lawv
tej tsev tsam phooj nyob ze Es Npees Has
Ntxes. Cov Fis Lis Tis tsa lawv tej tsev
tsam phooj nyob As Fes.
2 Cov Fis Lis Tis nthuav ua ib leej tuaj
vij cov His Xas Lais. Lawv nias tsam
qees, ces cov His Xas Lais swb cov Fis
Lis Tis. His Xas Lais tog kwv yees muaj
plaub txhiab leej tuag nyob nruab liaj
nruab teb. 3 Tsoom tub rog His Xas Lais
rov los hauv lub yeej. Tas tsoom kev
txwj kev laus hais tias :
"Ua cas hnub no HUAB TAIS cia peb
swb cov Fis Lis Tis ? Peb yuav mus tom

Xis Laus mus kwv Tswv Ntuj lub Xab
Cog Lus tuaj nyob hauv nruab nrab peb
kom nws cawm peb ntawm tsoom yeeb
ncuab."

4 Cov tug rog xa neeg mus tom Xis
Laus, lawv mus muab HUAB TAIS lub
Xab uas nws lub theej kiab yog cov
Tshiab Kes Lus Npis kwv tuaj. Es Lis ob
tug tub hu ua Hos Nis thiab Pis Nas,
nkawd nrog lub Xab Cog Lus mus. 5
Thaum lub Xab Cog Lus tuaj txog lub
yeej, tas tsoom His Xas Lais qw suab
nrov nroo ntws, tas ib cheeb tsam ze
ntawd nrov ntsuag qees, qeeg tas.

6 Cov Fis Lis Tis hnov cov suab nrov
nroo ntws lawv hais tias :

"Vim li cas yuav hnov suab nrov npaum
no hauv cov His Xas Lais tuaj."

Ces lawv hnov moo tias HUAB TAIS lub
Xab Cog Lus tuaj txog hauv cov His Xas
Lais lub yeej lawm. 7 Cov Fis Lis Tis
thiaj ntshai. Lawv hais tias :

"Tswv Ntuj tuaj nyob hauv lawv lub yeej.
Peb yuav raug xwv txheej xwb. Tsis zoo
li thaud lawm ! 8 Peb yuav raug xwv
txheej ! Leej twg yuav pab peb dim
ntawm tus Tswv Ntuj muaj hwj huam
ntawd txhais tes ? Nws yog tus xa tas
puas tsav yam xwv txheej tuaj rau Hais
Nkws Tos teb.

9 Tsoom Fis Lis Tis, nej sawv daws ua
siab loj mas ! Nej ua tseem txiv neej
mas ! Kom nej txhob poob ua cov His
Xas Lais qhev xws li thaud lawv ua nej
qhev. Nej ua siab tawv qhawv ntaus tsam.

10 Ces cov Fis Lis Tis pib tuaj nias
tsam. Cov His Xas Lais swb, lawv tso tes
khiav rov mus tom lawv tej tsev tsam
phooj. Lawv raug kev poob tsag loj
kawg. Tog His Xas Lais tuag peb caug
txhiab leej.

11 Cov Fis Lis Tis txeeb tau Tswv Ntuj
lub Xab Cog Lus. Es Lis ob tug tub Hos

Nis thiab Pis Nas nkawd kuj tuag.

Tus Leej Choj Es Lis tuag.

4 : 12 - 18.

12 Tib hnub ntawd, ib tug neeg xeem
Npes Yas Mis khiav mus txog Xis Laus.
Nws muab nws tej ris tsho dua, nws
nphoo plua av rau saum nws taub hau.

13 Thaum nws tuaj txog, Es Lis zaum
saum nws lub kim txwv ib ntawm qhov
rooj. Nws ntsia ntsoov txoj xub ke, vim
nws txhawj kawg txog Tswv Ntuj lub
Xab Cog Lus. Tus neeg khiav los ntawd
nws xub mus xa lub moo rau hauv lub
tsheej tso, ces tas sawv daws qw ntsuag
qees hauv lub tsheej. 14 Es Lis hnov
suab qw ntsuag qees, nws nug tias :

"Ua cas sawv daws qw ntsuag qees li
no ?"

Tus neeg khiav los ntawd thiaj maj
nrawm nroos tuaj xa lub moo rau Es Lis.

15 Es Lis muaj cuaj caum yim xyoo
lawm, nws tsis pom kev li. 16 Tus neeg
khiav los hais rau Es Lis tias :

"Hnub no kuv khiav ntawm lub yeej los."

Es Lis hais tias :

"Tub, muaj xwm dab tsi tshwm sim
tuaj ?"

17 Tus xa xov teb tias :

"His Xas Lais swb cov Fis Lis Tis, lawv
khiav tas lawm ! Peb tsoom tub rog raug
kev poob tsag loj. Koj ob tug tub tuag
lawm. Cov Fis Lis Tis txeeb tau Tswv
Ntuj lub Xab Cog Lus lawm."

18 Thaum tus xa xov hais txog Tswv
Ntuj lub Xab, mas Es Lis cia li vau hlo
saum nws lub kim txwv ntxeev mus rau
ntawm lub qhov rooj, nws lub xwb qwb
lov, ces nws tuag, vim nws laus thiab nws
yog neeg muaj ceeb thawj.

Es Lis tau saib xyuas tsoom His Xas Lais
plaub caug xyoo.

**Cov His Xas Lais thov kom Xas
Muas tsa ib tug vaj kav lawv.
8 : 4 - 7 + 10 - 22.**

8 4 Tas tsoom txwj laus His Xas Lais
sib sau tuaj cuag Xas Muas nyob
Las Mas.

5 Lawy hais rau Xas Muas tias :
"Koj laus lawm, koj cov tub tsis raws koj
tus lwj lwm. Thov koj tsa ib tug vaj rau
peb kom nws coj peb xws li luag tej haiv
neeg."

6 Xas Muas tsis zoo siab rau qhov lawv
hais tias :

'Koj muab ib tug vaj rau peb kom nws coj
peb.'

Ces Xas Muas hu txog HUAB TAIS.
7 HUAB TAIS hais tias :

"Koj ua tas puas tsav yam raws li tsoom
pej xeem thov. Tsis yog lawv yuav tso
koj tseg. Yog lawv yuav tso kuv tseg.
Lawv tsis xav kom kuv ua vaj kav lawv
ntxiv."

10 Xas Muas hais tas HUAB TAIS cov
lus rau tsoom pej xeem uas lawv thov ib
tug vaj ntawm nws.

11 Nws hais tias :
"Ntawm tus vaj yuav kav nej mas nws
yuav muaj cai ua zoo li no. Tus vaj yuav
sau nej tej tub mus saib nws cov tsheb rog
thiab tu nws cov nees. Lawv khiav mus
ua tus vaj ntej. 12 Nws yuav vam txog
nej cov tub los pab nws tswj tej pab
txhiab leej neeg, tswj tej pab tsib caug
leej neeg. Tus vaj yuav kom nej cov tub
laij nws cov teb, hlais nws cov nplej,
ntaus ntaj ntaus hmuv ua rog. 13 Tus
vaj yuav coj nej cov ntxhais mus ua cov
poj niam pleev tshuaj tsw qab rau nws, ua
zaub ua mov rau nws noj. 14 Tus vaj
yuav muab nej tej teb tej vaj txiv cawv
zoo tshaj los pub rau nws cov tub rog.
15 Nws yuav kom nej them cov se ib

feem kaum ntawm nej tej qoob loo thiab
ntawm cov txiv cawv, nws yuav muab
pub rau nws cov neeg sam thiab nws cov
thawj tub rog. 16 Nej tej ntxhais txib tub
txuas nquag dua cov, nej tej nyuj tej nees,
tus vaj yuav coj mus ua hauj lwm rau
nws.

17 Nej yuav tsum them cov se ib feem
kaum ntawm nej tej tsiaj, thiab nej haj
tseem yuav ua nws cov qhev thiab. 18
Ces hnub ntawd nej yuav qw suab vim
tus vaj uas nej tau xaiv. Tab sis hnub
ntawd HUAB TAIS yuav tsis teb rau nej
!"

19 Tsoom sid tsis mloog Xas Muas
cov lus ntuas lawv. Lawv hais tias :

20 "Peb yuav tsum muaj ib tug vaj xwb,
kom xwv peb thooj li luag tej haiv neeg.
Peb tus vaj yuav txiav txim rau peb. Nws
yuav mus ua peb ntej coj peb mus ntaus
rog."

21 Xas Muas hnov cov lus ntawd tas tib
si, nws hais qhia rau HUAB TAIS.

22 Tab sis HUAB TAIS hais tias :
"Koj ua raws li lawv hais. Koj tsa ib tug
vaj kav lawv."

Ces Xas Muas hais rau cov His Xas Lais
tias :

"Nej sawv daws nyias rov mus nyias lub
nroog."

**Xas Muas pleev Xas Ws ua vaj.
9 : 1 - 6 + 14 - 20 + 10 : 1.**

9 1 Nyob hauv lub xeem Npes Yas
Mis, muaj ib tug txiv neej hu ua
Kis, nws yog ib tug neeg siab loj. 2 Nws
muaj ib tug tub hu ua Xas Ws tab tom
tiav hluas, thiab zoo nraug. Tsis muaj ib
tug tub His Xas Lais zoo nraug npaum
nws. Nws siab dua sawv daws tib si.
Nws lub xub pwg siab tshaj sawv daws
huv tib si.

3 Muaj ib zaug Xas Ws txiv cov maum luij ploj lawm. Ces leej txiv hais rau nws tus tub Xas Ws tias :

"Koj coj ib tug tub txib nrog koj, neb mus nrhiav cov maum luij."

4 Nkawd mus hla lub roob Es Fais thiab lub teb chaws Sas Lis Sas, nkawd tsis pom dab tsi. Nkawd hla teb chaws Sas As Lis los tsis pom, teb chaws Npes Yas Mis los tsis pom.

5 Thaum nkawd tuaj txog lub teb chaws Xws, Xas Ws hais rau tus tub txib tias :

"Wb rov qab ! Nyob tsam kuv txiv tsis ntxhov siab rau cov maum luij lawm, hos nws ntxhov siab rau wb."

6 Tab sis tus tub txib hais tias :

"Tswv Ntuj muaj ib tug neeg nyob hauv lub nroog tid. Yog ib tug neeg nto koob meej zoo : nws hais dab tsi mas yuav muaj tuaj xwb. Wb mus xyuas nws saib nws hais dab tsi rau wb tuaj li no."

14 Ces nkawd nce mus pem lub nroog ntawd. Lawv tab tom yuav chaws mus hauv lub rooj loog, Xas Muas tawm tuaj ntsib lawv, nws yuav mus saum lub ncov roob. 15 Hnub ua ntej uas Xas Ws tseem tsis tau tuaj txog, mas HUAB TAIS twb qhia Xas Muas tias :

"Tag kis, tav li lub caij no, kuv yuav xa ib tug neeg nyob Npes Yas Mis tuaj.

16 Koj yuav pleev nws ua tus tswj kuv haiv His Xas Lais. Nws yuav cawm lawv ntawm cov Fis Lis Tis txhais tes. Kuv pom kuv haiv neeg lawv txoj kev txom nyem thiab lawv lub suab qw nrov tuaj txog kuv lawm."

17 Thaum Xas Muas pom Xas Ws, HUAB TAIS qhia Xas Muas tias :

"Tus ntawd, yog tus kuv hais rau koj tias nws yuav ua tus tswj kuv haiv neeg."

18 Txog ntawm qhov rooj, Xas Ws txawm hais rau Xas Muas tias :

"Kuv thov koj qhia tus neeg txawj ua hwj

huam lub tsev rau kuv."

19 Xas Muas teb Xas Ws tias :

"Kuv yog tus ua hwj huam ntawd ntag. Koj nce ua ntej mus saum lub ncov roob. Hnub no, neb yuav nrog kuv noj mov. Tag kis sawv ntxov kuv mam tso koj mus thiab qhia koj tias koj lub siab ntxhov txog dab tsi. 20 Ntawm cov maum luij uas twb poob zoo tau peb hnub lawm, mas koj txhob txhawj txog. Lawv nrhiav tau lawm.

10 1 Tag kis kaj ntug, Xas Muas muab lub tais roj los hliv rau saum Xas Ws taub hau thiab nws puag Xas Ws, nws hais tias :

"Yog HUAB TAIS pleev koj ua tus tswj nws lub cuab tam. Koj yuav ua tus txiav txim rau HUAB TAIS haiv neeg. Koj yuav cawm lawv ntawm cov yeeb ncuab uas nyob ncig lawv."

Cov His Xas Lais yuav Xas Ws ua vaj. 10 : 17 - 24.

17 Xas Muas hu tsoom pej xeem tuaj cuag HUAB TAIS nyob Mis Pas.

18 Xas Muas hais rau tsoom His Xas Lais tias :

"His Xas Lais tus HUAB TAIS Tswv Ntuj hais li no : Kuv, HUAB TAIS, kuv yog tus coj His Xas Lais nram Hais Nkws Tos teb los pem no. Kuv tau cawm nej ntawm cov Hais Nkws Tos thiab ntawm cov haiv neeg hiam nej. 19 Tab sis hnub no nej xyeeb nej tus Tswv Ntuj uas yog tus cawm nej ntawm kev txhawj xeeb. Nej hais rau nws tias : 'Peb tsis yuav koj ! Koj tsa ib tug vaj kav peb mas !' Li ntawd, nyem no, nej sawv daws tuaj nyob ntawm HUAB TAIS xub ntiag mas !'

20 Xas Muas kom cov xeem His Xas

Lais tib si txav los ze ntawm HUAB TAIS xub ntiag. Nws ntaus txheeb, ces raug lub xeem Npes Yas Mis.

21 Nws hu cov tuam yim neeg Npes Yas Mis tib si txav los. Nws rov ntaus txheeb, ces raug lub tuam yim neeg Mas This. Nws tseem hu lub tuam yim neeg Mas This ib leeg txav los zuj zus. Nws ntaus txheeb ces raug Xas Ws, yog Kis tus tub.

Lawv nrhiav tsis tau Xas Ws.

22 Lawv nug HUAB TAIS tias :

"Tus neeg ntawd puas tuaj nyob ntawm no ?"

HUAB TAIS teb tias :

"Nws tsiv nraim nyob hauv cov toob xib tod."

23 Lawv khiav mus nthos Xas Ws. Lawv coj nws los nyob hauv nruab nrab tsoom sid. Nws siab tshaj tas tsoom sid, tas tsoom sid txij nws xub pwg xwb.

24 Xas Muas hais rau tsoom pej xeem tias :

"Nej puas tau pom tus uas HUAB TAIS xaiv los ? Nyob tas hauv tsoom pej xeem tsis muaj tus zoo npaum nws."

Tas tsoom sid tsa suab qw tias :

"Kom peb tus vaj nyob mus txog txhiab niag tim puas xyoo !"

Xas Ws tsis mloog Tswv Ntuj lus, Tswv Ntuj yuav tso Xas Ws pov tseg. 15 : 16 - 23.

15 16 Xas Muas hais rau Xas Ws tias :

"Koj nyob twj ywm ! Cia kuv qhia koj txog qhov HUAB TAIS hais rau kuv nag hmo."

Xas Ws hais tias : "Koj hais."

17 Ces Xas Muas hais tias :

"Koj yog ib tug neeg me kawg, tab sis koj tsis yog tus tswj cov xeem His Xas Lais lod ? HUAB TAIS tsis tau pleev koj ua

vaj kav His Xas Lais lod ? 18 Nws xa koj mus ntaus rog, nws hais rau koj tias koj mus muab lub txim rhuav cov As Mas Les kom lawv ploj tas huv si. 19 Vim li cas koj tsis mloog HUAB TAIS lus ? Vim li cas koj tau nyiag khaws lawv tej cuab yeej cuab tam ? Koj ua tej yam tsis ntxim HUAB TAIS siab."

20 Xas Ws teb tias :

"Kuv twb mloog HUAB TAIS ! Kuv twb mus ntaus rog raws li HUAB TAIS qhia, kuv coj tau tus vaj As Mas Les hu ua As Nkas los lawm. Thiab kuv muab lub txim rhuav cov As Mas Les kom lawv ploj tas tib si. 21 Nyob hauv cov As Mas Les tej cuab yeej cuab tam kuv tsoom pej xeem kawg khaws cov tsiaj me thiab loj zoo tshaj coj los txi rau koj tus HUAB TAIS Tswv Ntuj nyob Zis Nkas xwb."

22 Tab sis Xas Muas teb tias :

"Yog dab tsi yuav xis HUAB TAIS siab zoo dua ? Puas yog cov thaj tua tsiaj thiab hlawv tsiaj txi Ntuj ? Los puas yog txoj kev mloog lus thiaj muaj nqis dua cov thaj txi Ntuj zoo nkauj ? Txoj kev ua siab sib muaj nqis dua cov roj tthis ! 23 Koj tau nug cov txiv yaig txiv muam. Koj hla Tswv Ntuj lus. Yog zoo li koj tau teev dab. Vim koj tso HUAB TAIS lo lus tseg, ces HUAB TAIS thiaj tso koj tseg. Nws tsis cia koj ua vaj ntxiv !"

Xas Muas pleev Das Vis ua vaj.

16 : 1 - 13.

16 1 HUAB TAIS hais rau Xas Muas tias :

"Koj tseem yuav quaj txog Xas Ws hov ntev ntxiv ? Kuv twb tso nws pov tseg lawm. Kuv tsis xav kom nws kav His Xas Lais ntxiv. Koj ntim roj puv tus kub nyuj, koj mus. Kuv xa koj mus tom Yes Xes tsev nyob Npes Les Hes, vim nyob

hauv nws cov tub kuv xaiv ib tug los ua vaj."

2 Xas Muas hais tias :

"Kuv yuav ua zoo li cas mus ? Yog Xas Ws hnov, mas nws yuav muab kuv tua."

HUAB TAIS teb tias :

"Koj yuav cab ib tug xyuas nyuj. Koj hais tias koj mus txi tus nyuj rau HUAB TAIS. 3 Koj yuav caw Yes Xes tuaj txi Ntuj. Kuv yuav qhia koj tias koj yuav ua zoo li cas. Koj yuav sawv kuv chaw pleev tus kuv yuav qhia rau koj."

4 Xas Muas ua raws li HUAB TAIS qhia. Thaum nws tuaj txog Npes Les Hes, cov txwj laus nyob hauv tsheej sawv daws ntshai tshee na, lawv tuaj cuag Xas Muas, lawv nug nws tias :

"Yaj Saub, koj tuaj li no. Koj puas coj txoj hmoov zoo tuaj rau peb ?"

5 Xas Muas teb tias :

"Kuv coj txoj hmoov zoo tuaj, kuv tuaj cev ib thaj txi HUAB TAIS."

6 Xas Muas kom Yes Xes thiab nws cov tub huv tib si tuaj, ces nws caw lawv tuaj txi Ntuj. Thaum lawv tuaj txog, Xas Muas xub pom Es Lis, nws xav tias :

"Yog HUAB TAIS tus pleev tuaj txog lawm."

7 Tab sis HUAB TAIS hais rau Xas Muas tias :

"Koj txhob saib nws tus yam ntxwv sab nraud los nws lub cev siab. Kuv tsis yuav nws. HUAB TAIS nws ntsuas tas txhia yam, nws tsis ntsuas zoo li neeg. Neeg saib tus yam ntxwv sab nraud, hos HUAB TAIS saib hauv lub siab lub plawv."

8 Yes Xes hu As Npis Nas Das tuaj nyob ntawm Xas Muas xub ntiag.

Xas Muas hais tias :

"Tsis yog tus uas HUAB TAIS xaiv thiab !"

9 Yes Xes coj Sas Mas tuaj, Xas Muas hais tias :

"Tsis yog tus HUAB TAIS xaiv."

10 Yes Xes coj nws xya leej tub ib tug zuj zus tuaj nyob ntawm Xas Muas xub ntiag, tab sis Xas Muas hais tias :

"HUAB TAIS tsis xaiv cov no ib tug li."

11 "Koj puas tshuav tub ntxiv ?"

Yes Xes teb tias :

"Tshuav tus tub ntxawg. Nws zov cov tsiaj nyob tom tshav zaub."

Xas Muas hais rau Yes Xes tias :

"Koj tso neeg mus hu nws los. Peb yuav zaum ntawm tsum mov no tos nws los tso."

12 Yes Xes thiaj tso neeg mus hu tus tub ntxawg los. Tus tub ntawd cov plaub hau liab daj. Nws lub ntsej muag zoo nraug. Nws sawm txhiaj kawg !

HUAB TAIS hais rau Xas Muas tias :

"Yog tus no. Koj pleev nws mas !"

13 Xas Muas nthos nkaus tus kub ntim roj, nws pleev tus tub ntxawg nyob hauv nruab nrab nws cov kwv tij. Txij hnub ntawd los HUAB TAIS lub tswv yim ya los nyob hauv Das Vis. Ces Xas Muas mam sawv kev rov mus Las Mas.

Das Vis tua Nkaus Lias.

17 : 32 - 50.

17 32 Das Vis hnov Nkaus Lias tsawm haiv His Xas Lais, nws hais rau tus vaj Xas Ws tias :

"Peb txhob muaj leej twg ntaus siab me vim tus Fis Lis Tis ntawd. Koj tus tub txib yuav mus ntaus nws."

33 Xas Ws teb Das Vis tias :

"Kuv mus ntaus tsis tau tus Fis Lis Tis ntawd. Koj yog ib tug me nyuam yaus, hos tus neeg ntawd txij nws yav hluas los nws yeej yog ib tug tub rog."

34 Das Vis hais rau Xas Ws tias :

"Yav nram ntej, koj tus tub txib zov nws txiv cov tsiaj nog zaub, yog muaj ib tug

tsov los ib tug dais los tom ib tug yaj lawm, 35 mas kuv caum tus tsiaj ntawd, kuv txeeb tus tsiaj nyeg ntawm nws qhov ncauj los. Yog tus tsiaj qus sawv ntsug tiv kuv mas kuv nthos nkaus nws cov hwy txwv ces kuv ntaus nws kom tuag. 36 Koj tus tub txib twb tua tau tsov tau dais. Tus Fis Lis Tis tsis txais lub Cim Txiat ntawd kuv kuj yuav muab nws tua thiab, vim nws thuam tus Tswv Ntuj muaj txoj sia tsoom tub rog."

37 Das Vis tseem hais tias :

"HUAB TAIS twb npo kuv ntawm tsov thiab dais cov rau tes rau taw, nws yeej yuav npo kuv ntawm tus Fis Lis Tis ntawd txhais tes thiab."

38 Ces Xas Ws thiab muab nws tej tsoos ua rog rau Das Vis hnav, muab ib lub mom tooj rau nws ntoo, muab ib lub tsho hlau rau nws hnav. 39 Xas Ws muab nws rab ntaj rau Das Vis sia tuaj saum lub tsho hlau. Tab sis thaum Das Vis hnav tas nws tshais ruam tsis tau, vim nws hnav tsis kam tej yam hnyav li ntawd. Nws hais rau Xas Ws tias :

"Kuv coj ntau yam li ntawd, mas kuv mus tsis taus kev, kuv hnav tsis kam li ntawd."

Ces lawv thiab pab nws rov hle txhua yam ntawd tseg. 40 Das Vis nthos nkaus nws rab qws. Nws xaiv tsib lub qe zeb du du nram hav dej los ntim rau hauv lub hnab uas nws ris zov yaj, nws cia li mus cuag tus Fis Lis Tis.

41 Tus Fis Lis Tis txav los ze Das Vis zuj zus. Muaj ib tug nqa ib lub vab hlau ua nws ntej. 42 Tus Fis Lis Tis tig los pom Das Vis, nws cem Das Vis vim Das Vis hluas hluas, Das Vis cov plaub hau daj liab, thiab nws zoo nraug zoo saib kawg. 43 Tus Fis Lis Tis hais rau Das Vis tias :

"Kuv puas yog ib tug dev. Ua cas koj nqa

ib rab qws tuaj tiv kuv ?"

Ces tus Fis Lis Tis tuav txog nws cov dab lub npe los tsawm Das Vis. 44 Tus Fis Lis Tis hais rau Das Vis tias :

"Koj txav los ze kuv mas ! Kuv yuav muab koj tej nqaij rau cov noog ya saum ntuj thiab cov tsiaj nyob nruab nrag noj."

45 Das Vis teb rau tus Fis Lis Tis tias :

"Koj tuav ntaj tuav hmuv tuaj tiv kuv, hos kuv tuav txog HUAB TAIS Xas Npas Os lub npe tuaj tiv koj. HUAB TAIS yog tsoom tub rog His Xas Lais tus Tswv Ntuj uas koj thuam.

46 Hnub no HUAB TAIS yuav muab koj rau hauv kuv txhais tes. Kuv yuav muab koj tua, kuv yuav txiat koj taub hau. Hnub no kuv yuav muab koj lub cev thiab tsoom tub rog Fis Lis Tis lub cev rau cov noog ya saum ntuj thiab cov tsiaj nruab nrag noj. Ces tas lub qab ntuj neeg yuav paub tias muaj ib tug Tswv Ntuj saib His Xas Lais. 47 Tas ib zeej tsoom nyob ntawm no yuav pom tias tsis tas HUAB TAIS yuav siv ntaj siv hmuv los pub txoj kev yeej, vim HUAB TAIS yog tus tswv coj tsam rog no. Nws yuav muab nej rau hauv peb xib teg."

48 Tus Fis Lis Tis Nkaus Lias pib tshais ruam tuaj cuag Das Vis. Das Vis thiab txav tawm ntawm phiaj tub rog His Xas Lais khiav mus thawj tus Fis Lis Tis.

49 Nws cev tes hauv nws lub hnab, nws thau tau ib lub qe zeb los, nws xuas hlua txawb lub qe zeb mus raug tus Fis Lis Tis hauv pliaj. Lub pob zeb nkag kiag hauv tus Fis Lis Tis Nkaus Lias hauv pliaj, Nkaus Lias cia li vau hlo khwb rwg ntsuav rau hauv av. 50 Ces Das Vis xuas hlua thiab pob zeb xwb, nws ntaus yeej tus Fis Lis Tis. Das Vis tua tus Fis Lis Tis tuag, nws txhais tes tsis tau tuav ntaj tuav hmuv li.

Xas Ws pib ntxub Das Vis.

18 : 6 - 11.

18 6 Thaum Das Vis mus tua tus Fis

Lis Tis Nkaus Lias rov qab los, mas cov poj niam tuaj txhua lub nroog His Xas Lais tuaj cuag tus vaj Xas Ws. Lawv dhia daj dhia luag hu nkauj, ntaus nruas, ntaus thaj cheej thiab nqua suab lom zem. 7 Cov poj niam hu nkauj dhia tias :

"Xas Ws tua ntau txhiab leej neeg. Hos Das Vis tua ntau vam leej neeg."

8 Xas Ws npau taws heev kawg vim tej lus ntawd tsis ntxim nws siab. Nws hais tias :

"Lawv muab ntau vam leej neeg rau Das Vis, muab txhiab leej neeg rau kuv xwb. Tshuav qhov lawv tsis tau hu nws ua vaj xwb !"

9 Ces txij hnub ntawd los, Xas Ws pib khib thiab ntxub Das Vis.

10 Tag kis, Tswv Ntuj ib tug dab phem los nyob hauv Xas Ws. Ces Xas Ws vwm. Thaum Das Vis tab tom qoj nws rab nkauj nog ncas li niaj hnub, mas Xas

Ws tuav nws rab hmuv ntawm tes,

11 Xas Ws tsa hlo nws rab hmuv, nws hais tias :

"Kuv yuav muab Das Vis nkaug kom mus lo rau tim phab ntsa !"

Tab sis Das Vis maim dhau Xas Ws rab hmuv ob zaug.

Yos Nas Thas thov kom Xas Ws txhob ua phem rau Das Vis.

19 : 1 - 7.

19 1 Xas Ws hais rau nws tus tub

Yos Nas Thas thiab rau cov thawj tub rog tias nws xav muab Das Vis tua pov tseg. Tab sis Xas Ws tus tub Yos Nas Thas nyiam Das Vis kawg.

2 Nws qhia Das Vis tias :

"Kuv txiv Xas Ws nrhia kev tua koj. Koj yuav ceev faj zoo. Tag kis sawv ntxov koj tsiv nraim nyob twj ywm."

3 Kuv yuav nrog kuv txiv tawm mus nraum daim teb. Kuv yuav hais zoo txog koj rau nws. Saib nws yuav ua dab tsi kuv mam rov los hais qhia koj."

4 Yos Nas Thas hais zoo txog Das Vis rau nws txiv Xas Ws. Yos Nas Thas hais tias :

"Tus vaj yuav tsis txhob ua txhaum rau nws tus tub txib Das Vis, vim Das Vis tsis tau ua txhaum dab tsi rau koj. Qhov nws tau ua mas yog ib yam pab koj ntau kawg xwb. 5 Nws muab nws txoj sia mus tiv rog, nws tua tus Fis Lis Tis, ces HUAB TAIS pub kom His Xas Lais yeej loj kawg. Koj pom tias His Xas Lais yeej mas koj yuav zoo siab. Vim li cas koj thiaj yuav ua txhaum ? Ua cas koj yuav ua kom ib tug neeg siab dawb tej ntshav ntws ? Ua cas koj yuav lam tau lam muab Das Vis tua ?"

6 Xas Ws mlooog Yos Nas Thas, nws cog lus tias :

"Yog HUAB TAIS muaj txoj sia tiag, mas Das Vis yuav tsis tuag."

7 Ces Yos Nas Thas hu Das Vis tuaj, nws hais tej ntawd qhia Das Vis tib si. Tas ces Yos Nas Thas coj Das Vis mus cuag Xas Ws. Das Vis rov ua nws txoj hauj lwm li qub.

Das Vis khiav mus tsiv nraim.

22 : 1 - 5.

22 1 Das Vis khiav tawm mus nkaum hauv lub qhov tsua As Dus Las. Nws cov kwv tij thiab nws tsev neeg hnov lub moo ntawd ces lawv nqes mus nrog nws nyob.

2 Cov neeg txom nyem, cov neeg tshuav

luag nuj nqes, cov tsis txaus siab, sawv daws khiav tuaj khaub zig Das Vis, ces nws ua lawv tus thawj coj. Nws muaj 400 tawm leej neeg nrog nws.

3 Das Vis tseem tso qhov chaw ntawd tseg, nws mus rau Mis Pes uas nyob Muas teb. Nws hais rau tus vaj Muas tias : "Thov koj pub kuv niam thiab kuv txiv nkawd nrog koj nyob ntawm no tos txog hnub kuv paub tias Tswv Ntuj yuav ua dab tsi rau kuv tso."

4 Das Vis tso nws niam thiab nws txiv nkawd nyob hauv tus vaj Muas tsev. Nkawd nyob ntawd tas lub caij uas Das Vis khaiv mus tsiv nrain.

5 Tus Yaj Saub Nkas hais rau Das Vis tias :

"Koj tsis txhob nkaum twj ywm hauv lub qhov tsua no xwb. Koj mus hauv Yus Das teb."

Ces Das Vis sawv kev mus txog hauv cov hav zoov nyob Hes Les.

**Das Vis tau kev muab Xas Ws tua,
tab sis nws tsis tua. 24 : 1 - 21.**

24 1 Das Vis tso thaj tsam ntawd tseg, nws mus nyob pem cov qhov tsua Es Nkas Dis.

2 Xas Ws mus caum cov Fis Lis Tis. Thaum nws rov qab los, luag hais rau nws tias :

"Das Vis mus pem thaj suab puam Es Nkas Dis lawm."

3 Xas Ws thiaj sau peb txhiab leej neeg nyob hauv tsoom His Xas Lais, nws kom lawv mus nrhiav Das Vis thiab Das Vis pab neeg ntawm cov pob tsuas Sai.

4 Xas Ws tuaj txog ntawm cov nkuaj yaj uas nyob ntawm ntug kev. Nyob ntawd muaj ib lub qhov tsua. Xas Ws mus so nyob hauv.

Das Vis thiab nws pab tub rog twb nkaum

hauv lub qhov tsua ntawd lawm thiab. 5 Cov tub rog hais rau Das Vis tias : "Txog hnub HUAB TAIS qhia koj tias : 'Kuv tso koj tus yeeb ncuab rau hauv koj txhais tes. Koj ua rau nws ywj koj siab mas."

Das Vis sawv, nws nyiag mus txiav Xas Ws ib sab tw tsho tshaj sab. 6 Nws ntshai, nws lub plawv dhia heev, vim nws txiav tau Xas Ws ib sab tw tsho tshaj sab lawm. 7 Nws hais rau nws pab tub rog tias :

"Thov kom HUAB TAIS txhob cia kuv ua phem rau kuv tus Huab Tais ! Kuv txhob tua Xas Ws, vim Xas Ws yog HUAB TAIS tus pleev."

8 Ces Das Vis hais tej lo lus tawv txwv tsis pub nws pab tub rog dhia mus tua Xas Ws. Xas Ws sawv, nws tawm hauv qhov tsua, nws mus taug nws txoj kev ntxiv.

9 Das Vis thiaj sawv, nws kuj tawm hauv qhov tsua mus, nws hu Xas Ws nrov nrov tias :

"Kuv tus tswv huab tais !"

Xas Ws tig ntsia rov tom qab. Das Vis khoov thiab pe Xas Ws. 10 Das Vis hais rau Xas Ws tias :

"Ua cas koj ntseeg cov neeg uas lawv hais rau koj tias Das Vis nrhiav ua phem rau koj ? 11 Hnub no, koj qhov muag pom tias HUAB TAIS muab koj rau hauv kuv txhais tes lawm nyob hauv lub qhov tsua no. Kuv tsis kam muab koj tua. Kuv cia koj ciaj. Kuv tau hais tias kuv txhais tes yuav tsis tua kuv tus huab tais, vim nws yog HUAB TAIS tus pleev. 12 Txiv, koj ntsia koj lub tsho ib sab nyob hauv kuv txhais tes no. Kuv tau txiav koj lub tsho ib sab, tab sis kuv tsis tau muab koj tua. Koj yuav tsum lees tias kuv lub siab tsis xav ua phem rau koj, tsis xav muab neeg tua. Kuv tsis tau ua txhaum rau koj, hos koj nrhiav kev ntes kuv thiab tso kuv tsoj

sia. 13 Kuv thov kom HUAB TAIS txiav saib puas yog kuv los yog koj muaj txhaum. Kuv thov kom HUAB TAIS pauj rau koj. Tab sis kuv txhais tes yuav tsis kov koj li. 14 Tej laus qhia hais tias: Cov neeg phem rho txoj kev phem tawm los. Ua li mas kuv yuav tsis tsa tes ntaus koj. 15 Vaj His Xas Lais, koj taug txoj kev ntaus rog, koj xav tua leej twg ? Koj caum leej twg ? Koj caum ib tug dev lod ? Los koj caum ib tug nyuag dev mub ? 16 Cia HUAB TAIS ua tus txiav txim rau wb. Kuv thov kom nws ntsuas kuv cai thiab npo kuv ntawm koj txhais tes."

17 Thaum Das Vis hais li ntawd tas rau Xas Ws, mas Xas Ws hais tias : "Kuv me tub Das Vis, puas yog koj lub suab tiag ?"

18 Ces Xas Ws quaj nrov nrov. Nws hais rau Das Vis tias :

"Koj siab ncaj dua kuv. Vim koj ua zoo rau kuv, hos kuv kawg ua phem rau koj xwb. 19 Hnub no koj tseem tau ua zoo tshaj rau kuv, vim HUAB TAIS twb muab kuv rau hauv koj txhais tes, tab sis koj tsis muab kuv tua. 20 Thaum ib tug neeg ntsib nws tus yeeb ncuab, nws puas yuav cia nws tus yeeb ncuab mus taug nws txoj kev ntxiv ? Kuv thov kom

HUAB TAIS pub paj tshab rau koj pauj qhov zoo uas hnub no koj tau ua rau kuv.

21 Nyem no kuv paub tseeb tias koj yuav ua vaj, thiab txoj kev ua vaj tswj His Xas Lais yuav nyob ruaj nreb hauv koj txhais tes."

Das Vis zam rau Xas Ws.
26 : 2 + 7 - 9 + 12 - 13 + 22 - 23.

26 2 Xas Ws sawv kev mus nram lub hav suab puam Xis Fes. Peb txhiab leej tub rog His Xas Lais zoo tshaj nrog nws mus caum Das Vis nyob hauv lub hav suab puam Xis Fes. 7 Das Vis thiab As Npis Sais nkawd maub mus soj Xas Ws pw tsaug zog nyob hauv nws lub yeej, nws rab hmuv txhos hauv av ze ntawm nws. Cov tub rog pw ncig Xas Ws. 8 Ces As Npis Sais hais rau Das Vis tias :

"Hnub no, HUAB TAIS tso koj tus yeeb ncuab rau hauv koj txhais tes. Koj cia kuv mus muab nws rab hmuv rov hno nws rau hauv av. Kuv nkaug ib teg xwb ces txaus lawm, tsis tas kuv yuav nkaug ob teg !"

9 Tab sis Das Vis hais rau As Npis Sais tias :

"Koj tsis txhob tua nws ! Leej twg tua HUAB TAIS tus pleev, mas nws yuav nyob tsis raug txim puas tau ?"

12 Ces Das Vis mus ze ntawm Xas Ws taw, nws muab Xas Ws rab hmuv thiab lub plhuaj taub dej. Ces nkawd khiav lawm. Tsis muaj leej twg pom nkawd. Sawv daws tsaug zog tas. Tsis muaj tus hnov li. 13 Das Vis hla hav dej mus sab tim ub, nws mus saum lub ncov roob nrug deb ntawm Xas Ws.

22 Das Vis mam li hu Xas Ws nrov nrov tias :

"Tus vaj rab hmuv nyob ntawm no ! Koj tso koj ib tug tub txib hla tuaj nqa mas !

23 Cia HUAB TAIS txiav txim rau nyias raws li nyias lub siab ncaj siab ncees. Hnub no HUAB TAIS muab koj rau hauv kuv tes, tab sis kuv tsis kam tsa tes tua koj, HUAB TAIS tus pleev !"

XAS MUAS PHAU OB

Xas Muas Phau Ob, Zaj 1 thiab 5

Das Vis hnov moo tias Xas Ws tuag 1 : 1 - 4 + 11 - 12 + 19 + 23 - 27.

1 1 Thaum Xas Ws tuag tas, mas Das Vis mus tua cov As Mas Les rov los txog. Nws nyob Xis Las teb ob hnub. 2 Hnub peb, ib tug neeg khaiv ntawm Xas Ws lub yeej los. Nws cov khaub ncaws ntuag tas, nws taub hau paug hmoov av tas. Thaum nws los txog ntawm Das Vis, nws txhos caug hauv av pe Das Vis.
3 Das Vis hais rau nws tias :
"Koj tuaj qhov twg tuaj ?"
Nws teb tias :
"Kuv khaiv ntawm lub yeej His Xas Lais los."
4 Das Vis nug tias :
"Ua cas lawm ? Koj qhia kuv saib !" Tus khaiv los teb tias :
"Tsoom pej xeem khaiv tas tso tsam rog tseg. Muaj coob leej kawg tuag. Xas Ws thiab nws tus tub Yos Nas Thas kuj tuag huv tib si lawm."
11 Ces Das Vis dua rhe nws lub tsho. Cov neeg nrog nws lawv kuj dua lawv tej tsho. 12 Sawv daws nyiav, sawv daws quaj thiab yoo mov mus txog tsaus ntuj. Lawv quaj Xas Ws thiab nws tus tub Yos Nas Thas. Lawv quaj txog HUAB TAIS haiv neeg thiab txog cov His Xas Lais uas lawv poob tsam. 19 Das Vis thiaj nyiav zoo li no :
"Aub ! His Xas Lais lub koob meej koj nyob lwj ntsuav saum koj cov roob ! Cov tub rog, ua cas nej thiaj ploj tas lawm ? 23 Xas Ws thiab Yos Nas Thas, thaud, nkawd ua nkawd lub neej zoo nyiam thiab zoo hlub. Nyem no, nkawd tuag, nkawd tuag ua ke. Nkawd nrawm dua dav. Nkawd muaj zog dua tsov. 24 Cov

ntxhais His Xas Lais, Xas Ws yog tus muab ntaub tsuj ntaub npuag rau nej hnav. Nws dai lias nyiav lias kub rau nej tej tsoos tsho. Zaum no nej nyiav Xas Ws mas ! 25 Cov tub rog, ua li cas lawv thiaj tuag nyob hauv tsam rog ntawd ? Yos Nas Thas, koj tuag lawm, cas yuav mob kuv lub siab ua luaj no ! 26 Kuv tu siab vim koj, kuv tus kwv Yos Nas Thas ! Kuv hlub koj tas nrho. Kuv nrog koj ua phooj ywg ! Kuv tseem hlub koj heev dua hlub ib tug poj niam. 27 Vim li cas cov tub rog thiaj li tuag ? Vim li cas rab ntaj thiab rab hmuv thiaj poob ntawm lawv tes ?"

Tsa Das Vis ua vaj. Nws mus nyob Yes Lus Xas Les. 5 : 1 - 7.

5 1 Cov xeem His Xas Lais tib si tuaj cuag Das Vis nyob Hes Nploos. Lawv hais rau nws tias :
"Peb nrog koj koom ib co pob txha ib ce nqaij. 2 Yav thaud, Xas Ws ua vaj, twb yog koj coj His Xas Lais mus los. HUAB TAIS tau hais rau koj tias : koj yuav coj kuv tsoom pej xeem His Xas Lais mus nog zaub. Koj yuav ua His Xas Lais tus tswv."
3 Tsoom txwj laus His Xas Lais thiaj tuaj cuag Das Vis nyob Hes Nploos. Tus vaj Das Vis nrog lawv cog lus nyob Hes Nploos, nyob ntawm Tswv Ntuj xub ntiag. Lawv pleev roj tsa Das Vis ua vaj His Xas Lais.
4 Thaum Das Vis nce ua vaj, nws lub hnub nyoog muaj peb caug xyoo. Nws tswj lub teb chaws plaub caug xyoo.
5 Nws ua vaj nyob Hes Nploos kav cov Yus Das xya xyoo thiab rau hli. Nws ua vaj nyob Yes Lus Xas Les kav cov His

Xas Lais thiab cov Yus Das peb caug peb xyoos.

6 Das Vis nrog nws pab tub rog sawv kev mus pem Yes Lus Xas Les, lawv mus ntaus cov Zes Npws uas ib txwm nyob txawm teb chaws ntawd. Cov Zes Npws hais rau Das Vis tias :

"Koj txhob tuaj teb chaws no ! Tab yog cov dig muag thiab cov ceg tawv los, lawv yeej ntiab tau koj."

7 Tab sis Das Vis mus txeeb tau lub yeej Xis Yoos. Yog Das Vis lub tsheej.

Das Vis coj lub Xab Cog Lus los nyob Yes Lus Xas Les.

6 : 12 - 19.

6 12 Luag hais rau Das Vis tias HUAB TAIS tso txoj hmoov zoo rau Os Npes Es Doos yim neeg thiab lub cuab tam tib si, vim Tswv Ntuj lub Xab Cog Lus nyob ntawd. Ces Das Vis mus, nws kom lawv coj Tswv Ntuj lub Xab Cog Lus hauv Os Npes Es Doos tsev mus rau saum Das Vis lub loog. Sawv daws zoo siab tas.

13 Thaum cov nqa HUAB TAIS lub Xab mus kaum ruam kev lawm, mas Das Vis txi ib tug nyuj thiab ib tug yaj rog. 14 Das Vis siv zog dhia ua si nyob ntawm HUAB TAIS xub ntiag, nws npua ib daig ntaub pag.

15 Das Vis thiab tas tsoom His Xas Lais coj HUAB TAIS lub Xab Cog Lus los rau pem Yes Lus Xas Les, ces sawv daws qw suab thiab tshuab hom.

16 Thaum HUAB TAIS lub Xab Cog Lus los hauv Das Vis lub tsheej, mas Xas Ws tus ntxhais hu ua Mis Kas uas yog Das Vis poj niam, nws nyob ntawm qhov rooj xauj, nws pom Das Vis dhia thiab hom khaj nyob ze HUAB TAIS. Mis Kas thuam Das Vis nyob hauv nws siab.

17 Lawv coj HUAB TAIS lub Xab Cog Lus los nyob hauv lub Tsev Tsam Phooj uas Das Vis tau npaj txais lub Xab Cog Lus. Lawv tso lub Xab Cog Lus rau hauv lub tuam Tsev Tsam Phooj ntawd. Das Vis hlawv tsiaj txi Ntuj nyob ntawm HUAB TAIS xub ntiag, thiab nws ua tej thaj txi Ntuj uas sawv daws noj cov txim ua ke.

18 Thaum Das Vis hlawv tsiaj thiab ua thaj txi Ntuj tas mas nws tuav txog HUAB TAIS lub npe los foom hmoov zoo rau cov His Xas Lais. 19 Das Vis faib txhiam xws rau tsoom His Xas Lais, tsis hais txiv neej los poj niam huv tib si. Nws faib ib leeg ib lub mov, ib co txiv ntoo thiab ib lub ncuav qab zib. Tas ces sawv daws nyias rov mus nyias tsev.

Nas Taas ua Yaj Saub qhia Das Vis.
7 : 1 - 9 + 11 - 19 + 22 - 29.

7 1 Thaum Das Vis tuaj nyob hauv nws tsev thiab HUAB TAIS pab nws rhuav cov yeeb ncuab nyob ib ncig ntawm nws tib si, ces tus vaj Das Vis hais rau tus Yaj Saub Nas Taas tias :

"Koj ntsia saib ! Kuv nyob hauv ib lub tsev ntoo faj khaum, hos Tswv Ntuj lub Xab Cog Lus nyob hauv ib lub Tsev Tsam Phooj xwb!"

3 Nas Taas teb rau tus vaj tias : "Koj ua raws li koj siab nyiam, vim HUAB TAIS nrog koj nyob."

4 Hmo ntawd, Nas Taas hnov Tswv Ntuj lo lus no :

5 "Koj mus hais rau kuv tus tub txib Das Vis tias HUAB TAIS hais li no : Puas yog koj yuav txhim ib lub tsev rau kuv nyob txawm hauv ? 6 Txij hnub kuv tau coj tsoom His Xas Lais nyob Hais Nkws Tos teb los rau ntawm no los txog tav no, kuv tsis tau nyob hauv ib lub tsev ib zaug.

Kuv tau tshais chaw mus li. Kuv kawg tau nyob hauv ib lub Tsev Tsam Phooj xwb. 7 Tas lub zim txwv kuv tau nrog tas tsoom His Xas Lais tshais chaw mus los, kuv puas tau hais rau ib tug nom tswv His Xas Lais uas coj cov His Xas Lais kev tias :

'Ua cas nej tsis txhim ib lub tsev ntoo faj khaum rau kuv nyob ?'

8 Nas Taas, nyem no koj mus hais rau kuv tus tub txib Das Vis tias :

HUAB TAIS Xas Npas Os hais li no :

Kuv yog tus tau rho koj hauv cov tshaw zaub thiab hauv nruab nrab pab yaj los tsa ua tus tswv saib kuv tsoom pej xeem His Xas Lais.

9 Kuv tau nrog koj ua tas puas tsav yam hauj lwm. Kuv tau rhuav koj cov yeeb ncuab tib si nyob ntawm koj xub ntiag. Kuv yuav pub kom koj lub npe nto moo loj cuag li cov vaj loj tshaj nyob thoob tas ntiaj teb. 11 HUAB TAIS yuav ua kom koj loj. HUAB TAIS yuav tsim ib tsev neeg los pub rau koj.

12 Thaum koj sim neej dua tas koj yuav mus nrog koj cov poj yawm txwv koob pw, kuv yuav cia koj ib tug xeeb ntxwv tawm ntawm koj roj ntsha los hloov koj ua vaj. Kuv yuav nres nws txoj kev ua vaj kom nyob ruaj nreb.

14 Kuv yuav ua nws txiv, nws yuav yog kuv leej tub. Yog nws ua qhov phen, kuv yuav xuas ib tug pas los muab txim rau nws, kuv yuav ntaus nws xws li neeg ntaus neeg. 15 Tab sis kuv yuav tsis than kuv lub txaj ntsim ntawm nws los xws li kuv tau than tus xub ua vaj dua koj.

16 Koj tsev neeg thiab koj txoj kev ua vaj yuav nyob mus li nyob ntawm kuv xub ntiag. Koj lub theej kiab yuav nyob ruaj nreb mus ib txhis."

17 Nas Taas qhia cov lus nws tau hnov ntawm HUAB TAIS los tib si rau Das Vis

mloog.

18 Ces Das Vis mus hauv HUAB TAIS lub Tsev Tsam Phooj, nws zaum nyob ntawm HUAB TAIS xub ntiag, nws hais tias :

"HUAB TAIS Tswv Ntuj, kuv yog ib tug neeg zoo li cas, kuv tsev neeg yog ib tse neeg zoo li cas, koj thiaj yuav coj kuv mus taug ib txog kev zoo cuag li no ?

19 Koj ua zoo li ntawd rau kuv, tseem tsis tau txaus koj siab ! Koj tseem cog lus rau koj tus tub txib tsev neeg mus rau yav tom ntej.

22 HUAB TAIS Tswv Ntuj, koj loj. Tsis muaj dua lwm tus yuav loj cuag li koj. Tsis muaj dua lwm tus Tswv Ntuj. Kawg koj tib leeg thiaj ua Tswv Ntuj, raws li ib txwm los peb tau hnov. 23 Nyob ntiaj teb no, puas muaj lwm haiv neeg zoo li haiv His Xas Lais? Puas muaj dua lwm haiv neeg uas Tswv Ntuj tau txhiv los ua nws tug, tau pub koob meej loj rau, tau ua tej yam hwj huam loj los pab lawv, tau caum ntau tus vaj, ntau tus dab khiav mus deb, xws li Tswv Ntuj tau ua los pab His Xas Lais txog tav no ?

24 HUAB TAIS, koj tau tsa His Xas Lais ua koj haiv neeg mus li. Koj yog lawv tus Tswv Ntuj. 25 Nyem no, HUAB TAIS, koj nco ntsoov lo lus koj tau cog rau koj tus tub txib thiab rau nws caj ces. Thov koj ua raws nraim li koj tau hais.

26 Koj lub npe yuav nto moo lug mus li. Luag yuav hais tias HUAB TAIS Xas Npas Os ua Tswv Ntuj nyob saum His Xas Lais. Koj tus tub txib Das Vis tsev neeg yuav nyob mus li nyob ntawm koj xub ntiag.

27 HUAB TAIS, His Xas Lais tus Tswv Ntuj, koj yog tus tau qhia koj tus tub txib tias koj yuav tsim ib tsev neeg rau nws. Yog vim li ntawd kuv thiaj muaj cuab kav thov koj.

28 HUAB TAIS Tswv Ntuj, koj yog Tswv Ntuj, koj cov lus yog lus tseeb. Koj tau cog lus zoo li ntawd rau koj tus tub txib. 29 Thov koj tso lus foom hmoov zoo rau koj tus tub txib tsev neeg, kom nws tsev neeg nyob ntawm koj xub ntiag mus li. HUAB TAIS Tswv Ntuj, yog koj tau hais cov lus no. Koj lo lus foom hmoov yuav ua kom koj tus tub txib tsev neeg muaj txoj hmoov zoo mus ib txhiab ib txhis."

Das Vis ua txhaum. 11 : 1 - 17.

11 1 Thaum rov qab chiv xyoo tshiab, yog lub caij cov vaj sawv kev rov mus ntaus rog. Das Vis tso Yuas thiab cov tub rog huv tib si mus. Lawv tua cov As Mos thiab mus vij lub tsheej Las Npas. Hos Das Vis, mas nws nyob Yes Lus Xas Les.

2 Muaj ib hnub yuav tsaus ntuj, Das Vis nyuam qhuav sawv ntawm nws lub txaj los, nws mus mus los los nyob saum txheej tsev siab, nws ntsia pom ib tug poj niam da dej. Tus poj niam ntawd zoo nkauj kawg.

3 Das Vis nug tias tus poj niam ntawd yog leej twg. Lawv teb tias : "Yog Npes Txas Npes, Es Lis tus ntxhais, uas yog Us Lis poj niam."

4 Ces Das Vis tso neeg mus hu Npes Txas Npes tuaj. Npes Txas Npes tuaj nrog Das Vis pw tas, ces nws rov mus tsev. 5 Tsis ntev Npes Txas Npes xeeb tub. Nws xa lus tuaj rau Das Vis tias :

"Kuv xeeb tub lawm !"

6 Ces Das Vis fi xov mus rau Yuas tias : "Koj xa tus His Tis hu ua Us Lis los rau kuv."

Yuas xa Us Lis rov los rau Das Vis.

7 Thaum Us Lis los txog, Das Vis nug tias Yuas nyob zoo li cas lawm, kev ntaus

rog mus zoo li cas. Ces Das Vis hais rau Us Lis tias :

8 "Koj mus tsev mog ! Koj mus ntxuav taw."

Us Lis thiaj tawm hauv Das Vis lub tuam tsev mus, muaj ib tug nqa tus vaj cov paj tshab lawv Us Lis qab. 9 Tab sis Us Lis mus tsis txog tsev. Nws nrog tus vaj cov tub rog pw ntawm tus vaj lub rooj loog.

10 Muaj neeg mus qhia Das Vis tias :

"Us Lis mus tsis txog tsev."

Das Vis nug Us Lis tias :

"Koj twb mus tawm rooj rov los, ua cas koj mus tsis txog koj tsev ?"

11 Us Lis teb Das Vis tias :

"Lub Xab Cog Lus thiab haiv His Xas Lais thiab cov Yus Das pw nyob hauv tsev tsam phooj xwb, hos kuv tus tswv Yuas thiab huab tais cov peeb zeej pw nraum tshav puam. Ua cas kuv tseem yuav mus hauv tsev, mus noj mov haus cawv thiab nrog kuv poj niam pw lod ? Koj muaj txoj sia, thiab kuv muaj txoj sia ! Mas kuv yuav tsis ua li ntawd ib zaug !"

12 Das Vis hais rau Us Lis tias :

"Hnub no koj nyob ib hnub ntawm no, tag kis kuv mam tso koj mus."

Ces hnub ntawd Us Lis nyob Yes Lus Xas Les ib hnub. 13 Tag kis, Das Vis caw nws tuaj nrog Das Vis noj mov, ces Das Vis muab cawv rau nws haus kom qaug. Hmo ntawd Us Lis tawm mus pw nraum zoov. Nws tus tswv cov peeb zeej zov nws xwb. Us Lis tsis nqes mus nram nws tsev.

14 Hnub tom qab, Das Vis sau ib tsab ntawv mus rau Yuas, nws muab rau Us Lis nqa mus. 15 Nyob hauv tsab ntawv nws hais rau Yuas tias :

"Nej muab Us Lis mus rau hauv qhov chaw uas rog ceev tshaj tej, nej cia nws mus xwb, nej sawv daws thaub rov qab.

Nej cia lawv tua nws kom nws tuag."

16 Yuas coj nws pab tub rog mus vij lub nroog, nws muab Us Lis tshem mus rau ntawm qhov chaw uas nws paub tias muaj cov tub rog siab loj. 17 Cov neeg nyob hauv nroog tawm tuaj ntaus Yuas. Cov tub rog His Xas Lais tuag ntaw leej, Das Vis cov peeb zeej kuj tuag ob peb leeg. Us Lis, tus His Tis, kuj tuag thiab.

**Tus Yaj Saub Nas Taas ntuas Das
Vis. 12 : 1 - 17.**

12 1 HUAB TAIS xa tus Yaj Saub
Nas Taas tuaj cuag Das Vis. Nas
Taas chaws mus hauv Das Vis tsev, nws
hais rau Das Vis tias :

"Muaj ob tug txiv neej nyob hauv ib lub nroog, ib tug yog neeg nplua nuj, ib tug yog neeg pluag. 2 Tus nplua nuj muaj tsiaj txhu coob, muaj tsiaj loj tsiaj me, muaj nyuj muaj tshis coob kawg. 3 Hos tus pluag nws kawg muaj ib tug yaj nkaus xwb uas nws muas los. Nws yug nws tus yaj ntawd hlob, nws cia tus yaj nrog nws thiab nws cov me nyuam nyob. Tus yaj nrog nws noj mov, nrog nws haus dej, nrog nws pw ua ib txag, cuag li yog nws tus ntxhais.

4 Muaj ib tug qhua tuaj hauv tus nplua nuj tsev, tus nplua nuj tsis xav siv nws ib tug tsiaj los tua rau tus qhua noj. Ces nws mus nyiag tus pluag tus yaj los tua txais tus qhua ntawd."

5 Das Vis hnov Nas Taas lo lus, nws npau taws heev, nws hais rau Nas Taas tias :

"Yog HUAB TAIS muaj txoj sia tiag mas

tus niag ua li ntawd tsim nyog tuag !

6 Nws yuav tsum them tus yaj ntawd plaub npaug, vim nws tau ua phem thiab nws tsis txawj hlub neeg."

7 Nas Taas hais rau Das Vis tias :

"Tus neeg ntawd yog koj ! HUAB TAIS Tswv Ntuj hais li no : Kuv pleev koj. Kuv tsa koj ua His Xas Lais tus vaj. Kuv cawm koj dim ntawm Xas Ws tes. 8 Kuv tau muab koj tus vaj tsev neeg rau hauv koj txhais tes. Kuv tau pub tsoom His Xas Lais thiab tsoom Yus Das rau koj. Yog tseem tsis tau txaus koj siab mas tab yog yam twg los kuv tseem zoo siab muab rau koj tib si. 9 Tab sis vim li cas koj thiaj li ua qhov uas HUAB TAIS tsis nyiam ? Koj xuas ntaj tua Us Lis, koj yuav nws poj niam los ua koj poj niam, koj txhob txwm ua kom cov As Mos rab ntaj tua Us Lis. 10 Ua li mas txij no mus, hniav ntaj yuav tsis zam koj tsev neeg ntxiv lawm, vim koj tsis nco txog kuv. Koj coj tus His Tis Us Lis poj niam los ua koj poj niam.

11 HUAB TAIS hais li no :
Kuv yuav ua kom muaj ib co xwv txheej tawm hauv koj tsev neeg tuaj raug koj. Kuv yuav ua kom cov txheeb ze koj txeeb koj cov poj niam los ua lawv poj niam rau ntiaj teb neeg pom. 12 Ntawm koj, mas koj nyiag zais ntshis ua txhaum, tab sis kuv yuav tab meeg ua tej yam ntawd kom tawm los rau tsoom His Xas Lais pom thiab rau lub ntiaj teb pom."

13 Ces Das Vis hais rau Nas Taas tias :
"Kuv ua txhaum rau HUAB TAIS lawm !"

Nas Taas hais rau Das Vis tias :

"HUAB TAIS zam rau koj, koj yuav tsis tuag. 14 Tab sis koj tau ua kom HUAB TAIS tu siab li no, mas koj tus me nyuam yuav tuag."

15 Nas Taas hais li ntawd tas nws rov mus lawm. HUAB TAIS tso xwv txheej tuaj rau Das Vis tus me nyuam uas yug ntawm Us Lis tus poj niam los. Tus me nyuam pib mob heev. 16 Das Vis thov Ntuj rau nws tus me nyuam. Nws yoo

tsis noj ib lub mov. Nws nyob hauv tsev. Hmo ntuj nws muab ib lub hnab tsaj pua nws pw xwb.

17 Cov nom nyob hauv nws tsev, lawv sawv daws tuaj sawv ntsug ncig nws, xav tsa kom nws sawv, tab sis nws tsis kam. Nws tsis nrog lawv noj ib lub mov li.

As Ntxas Loos ntxeev siab.

15 : 7- 12.

15 7 Plaub xyoos tom qab, As Ntxas Loos hais rau tus vaj Das Vis tias : "Thov koj kheev kuv mus Hes Nploos. Kuv yuav mus pauj lub yeem uas kuv tau fiv rau HUAB TAIS. 8 Thaum kuv tseem nyob Zes Xus nyob As Las teb, kuv tau fiv yeem tias yog HUAB TAIS coj kuv rov los txog Yes Lus Xas Les mas kuv yuav mus ua ib thaj teev HUAB TAIS nyob Hes Nploos."

9 Tus vaj hais rau nws tias :

"Koj tso siab lug mus mog !"

Ces As Ntxas Loos sawv kev mus Hes Nploos. 10 As Ntxas Loos tso neeg mus hais rau cov xeem His Xas Lais tib si tias :

"Thaum nej hnov suab hom nrov, nej yuav hais tias : yog As Ntxas Loos nce ua vaj nyob Hes Nploos."

11 Muaj ob puas leej neeg nyob Yes Lus Xas Les nrog As Ntxas Loos mus rau Hes Nploos. As Ntxas Loos caw lawv kom lawv mus, ces lawv cia li mus xwb, lawv tsis tau hnov hais txog dab tsi li. 12 As Ntxas Loos tso neeg mus hu As His Tos Fes nyob Zis Los, uas nws yog Das Vis tus tim xyoob kom tuaj nrog nws mus txi Ntuj.

Li ntawd, ces pab neeg nrog nws ntxeev siab muaj zog tuaj thiab lawv coob zuj zus.

Das Vis khiav.

15 : 13 - 14 + 30 + 16 : 5 - 13.

13 Muaj ib tug neeg tuaj qhia Das Vis tias :

"Cov His Xas Lais cia siab rau As Ntxas Loos lawm."

14 Ces Das Vis hais rau nws cov thawj tub txib nyob Yes Lus Xas Les tias :

"Peb khiav mus ! Yog tsis khiav mas peb yuav tsis dim ntawm As Ntxas Loos. Nej tsuag tsuag mus, tsam As Ntxas Loos tuaj ntaus peb sai, ces peb raug xwv txheej thiab nws yuav xuas ntaj tua tas lub nroog huv tib si."

30 Das Vis quaj nce phab toj pem Roob Txiv Ntoo Roj. Nws qhwv taub hau thiab mus ko taw do. Tas tsoom pej xeem sawv daws nrog nws nce mus pem lub roob. Lawv kuj muab ntaub npog taub hau thiab lawv quaj.

16 5 Thaum Das Vis tuaj txog Npas Hus Lis, muaj ib tug txiv neej tawm tuaj. Nws yog Xas Ws xeem. Nws hu ua Xis Mes Is. Nws hais tej lo lus tsawm Das Vis. 6 Nws txawb pob zeb rau Das Vis thiab rau Das Vis cov tub txib siab loj. Sawv daws thaiv tus vaj zoo, lawv thaiv ntawm nws sab xis thiab sab laug huv si.

7 Xis Mes Is tsawm Das Vis tias :

"Khiav mus ! Kav tsij khiav mus, Niag tes lo ntshav ! Niag neeg tsis tsim txiaj !

8 HUAB TAIS ua kom Xas Ws tsev neeg cov ntshav rov poob los tsuam koj, vim koj tau txeeb nws tus vaj ua. Nyem no HUAB TAIS thiaj cia koj tus tub As Ntxas Loos ua vaj. Nyem no koj yuav raug txom nyem vim koj tes lo ntshav."

9 As Npis Sais, hais rau tus vaj tias :

"Ua cas yuav cia niag dev tuag aws no tsawm tus vaj ? Cia kuv mus txiat nws

taub hau saib !"

10 Tab sis Das Vis teb tias :

"Xes Lus Yas, kuv yog ib tug tsis muaj tsim dab tsi rau nej ! Nws tsawm los ntshai yog HUAB TAIS hais rau nws tias :

'Koj tsawm Das Vis.' Li ntawd, mas leej twg kuj hais tsis tau rau nws tias : 'Ua cas koj ua li ntawd ?'

11 Das Vis hais rau As Npis Sais thiab nws cov tub txib tias :

"Nej saib ! Tus tub kuv yug kiag twb xav muab kuv tua, mas phim tus Npes Yas Mis ntawd haj yam yuav ntxub kuv ! Nej cia nws tsawm kuv ntxiv. Ntshai yog HUAB TAIS qhib nws ncauj kom tsawm.

12 Nyaj tej zaud HUAB TAIS yuav pom kuv txoj kev txom nyem ces nws yuav muab ib yam zoo los pauv cov lus tsawm uas hnub no kuv raug."

13 Ces Das Vis thiab nws cov neeg mus ntxiv.

As Ntxas Loos tuag.

**18 : 6 - 7 + 9 - 10 + 14 + 24 - 25 + 31 -
32 + 19 : 1 - 3.**

18 6 Das Vis tsoom pej xeem khiav mus nyob nruab liaj nruab teb.
Lawv mus tiv cov His Xas Lais uas mloog As Ntxas Loos. Lawv sib ntsib nyob hauv lub hav zoov Es Fais.
7 Tsoom tub rog His Xas Lais swb Das Vis cov tub txib. Cov His Xas Lais raug sab kawg. Lawv tuag muaj nees nkaum txhiab leej.
9 As Ntxas Loos khiav mus thawj tau Das Vis ib co neeg. As Ntxas Loos caij ib tug luij, tus luij cia li chaws mus hauv ib tsob qab ntoo qhib loj ces As Ntxas Loos lub taub hau daig saum cov ceg qhib, nws dai viav vias nyob ib nta ntoo. Hos tus luij dhia mus lawm.

10 Muaj ib tug neeg pom, nws mus hais qhia Yuas tias :

"Kuv nyuam qhuav pom As Ntxas Loos dai saum ib tsob ceg qhib."

14 Ces Yuas nqa peb rab hmuv, nws nkaug As Ntxas Loos hauv siab uas As Ntxas Loos tseem ciaj dai saum cov ceg qhib.

24 Das Vis zaum nyob ze ntawm lub qhov rooj. Tus peeb zov yeej nce mus tuaj saum ntsa zeb ntsia, nws pom ib tug neeg khiav khiav los. 25 Tus peeb qw rau tus vaj, tus vaj hais tias :

"Yog nws ib leeg xwb mas yog nws coj ib lub moo zoo los xwb."

31 Ces tus Kus Xis los txog ze ntawm tus vaj, nws hais rau tus vaj tias :

"Vaj, koj mloog lub moo no. Hnub no HUAB TAIS ua zoo rau koj, nws cawm koj ntawm cov neeg sawv ntxeev siab rau koj."

32 Tus vaj nug tus Kus Xis tias :

"Tus hluas As Ntxas Loos puas nyob zoo ?"

Tus Kus Xis teb tias :

"Xav kom HUAB TAIS cov yeeb ncuab thiab cov neeg xav ntxeev siab rau koj tau tuag xws li tus hluas ntawd !"

19 1 Ces tus vaj Das Vis ib ce muag tas. Nws nce mus saum kem tsev siab, ces nws quaj quaj. Nws quaj hu quaj hu tias :

"Kuv me tub As Ntxas Loos ! Kuv me tub ! Kheev lam kuv sawv koj chaw tuag ! As Ntxas Loos ! Kuv tus me tub !"

2 Lawv mus hais qhia Yuas tias :

"Tus vaj quaj quaj txog As Ntxas Loos."

3 Hnub ntawd lawv yeej, tab sis sawv daws zoo li ntoo xyom tas, vim cov tub rog hnov tias tus vaj quaj quaj txog nws tus tub.

Das Vis txheeb tsoom pej xeem.
Tswv Ntuj nplua Das Vis.
24 : 2 + 9 - 17.

24 2 Tus vaj hais rau Yuas uas yog
 nws tus thawj tub rog tias :

"Nej mus ncig xyuas cov xeem His Xas
 Lais txij Das mus rau Npes Xas Npes, nej
 txheeb cov neeg tas tib si, kom kuv paub
 meej saib muaj pes tsawg leej neeg."

9 Yuas mus txheeb neeg tas, nws los hais
 qhia rau Das Vis tias muaj pes tsawg leej.
 Cov His Xas Lais muaj yim pua txhiab
 leej tub rog uas lawv leeg muaj rab ntaj.
 Cov Yus Das muaj tsib puas txhiab leej.

10 Das Vis kom Yuas txheeb neeg li
 ntawd tas mas Das Vis lub siab nyob tsis
 tus, nws hais rau HUAB TAIS tias :

"Kuv tau ua ib qho txhaum loj kawg !
 Nyem no, HUAB TAIS, thov koj zam rau
 koj tus tub txib, vim kuv tau yuam kev loj
 kawg."

11 Tag kis sawv ntxov, thaum Das Vis
 sawv los, tus Yaj Saub Nkas hnov HUAB
 TAIS lo lus qhia nws tias :

12 "Koj mus hais rau Das Vis tias HUAB
 TAIS hais li no : Kuv hais peb yam rau
 koj. Koj xaiv ib yam ces kuv yuav ua yam
 ntawd rau koj."

13 Ces tus Yaj Saub Nkas mus cuag Das
 Vis, nws hais rau Das Vis tias :

"Koj puas nyiam cia koj lub teb chaws
 tshaib plab xya xyoo ? Los koj puas yeem
 swb cov yeeb ncuab peb hlis, cia koj
 khiau lawv ? Los koj puas yeem cia koj

lub teb chaws raug mob aws peb hnub ?
 Nyem no, koj xav tswv yim ces koj thiab
 hais saib kuv yuav teb dab tsi rau tus xa
 kuv tuaj."

14 Das Vis hais rau Nkas tias :
 "Kuv nyuaj siab kawg ! Ntshai yeem cia
 peb poob nyob hauv HUAB TAIS txhais
 tes zoo dua. Vim nws kheev hlub neeg
 kawg. Kuv tsis xav poob nyob hauv neeg
 txhais tes."

15 Ces Das Vis yeem xaiv tus mob aws.
 Thaum ntawd yog lub caij hlais nplej.
 HUAB TAIS tso aws los rau cov His Xas
 Lais txij thaum sawv ntxov mus txog lub
 caij nws teem. Tas sawv daws raug tus
 mob aws. Muaj xya caum txhiab leej neeg
 tuag nyob hauv lub teb chaws Das mus
 rau Npes Xas Npes. 16 Tus Tshiab
 xyab tes tso aws mus rau Yes Lus Xas
 Les thiab. Tab sis HUAB TAIS ho rov
 khuv leej, nws hais rau tus Tshiab rhuav
 txoj sia tias :

"Txaus lawm ! Nyem no koj nkaum koj
 txhais tes rov qab."

Tus Tshiab thiab mus nyob ze ntawm As
 Laus Nas uas yog cov Zes Npws lub
 tshav ntaus nplej. 17 Thaum Das Vis
 pom tus Tshiab uas tso aws tuaj rau
 tsoom pej xeem, Das Vis hais rau HUAB
 TAIS tias :

"Yog kuv tau ua txhaum, yog kuv tau ua
 tsis zoo xwb. Cov ntawd yog pab yaj.
 Lawv tsis tau ua phem dab tsi. Thov kom
 koj txhais tes ntaus kuv thiab kuv tsev
 neeg xwb mas !"